

Jrei Dabi nämane bati tuen nete obeja ngätäite. Dabikwe ka tikani kabre abko nämane täke arbabti abko, tä tikani kabre tärä Ngöbökwebtä Salmobtä. Niara tuen arba täke amne kare nete. Dabita arba täke nuäre amne Ngöbö tare kri kwe abko tä niere nuäre kore arato. Kukwe tikani Dabikwe abko mden tä ruäre nete abko krörö:

Dänkin Ngöbö ti Ngibiaka;

diebti jändrän jökrä tädi tikwe.

Mikä kuin kanti ti mikadi jadüke kwe.

Ñö kuin kanti näin ti jie ngwena.

Abko Dabikwe tikani kore.


KUKWE NGWIANDRETARI:

1. ¿Ni ne kä ño?

2. ¿Tä dre nuene?

3. ¿Ka tikani kwe gare ruäre mae ya?

Salmo 23




Jrei Dabi mden abko dokwäbti koronata nete. Ni mda abko ni Ngöbö kukwei niekä kädianta Natan abko Ngöbökwé juani blite Dabibe. Natan tä kise kite Dabibtä amne kä jürä nibi Dabibtä, ñobtä ñan angwane Dabikwe kukwe nuenbare käme krübäte abko jatabare Ngöböye abtä Ngöbökwé mikadi ja ngie nuen. Ye abko Ngöbökwé Natan juani niere Dabiye. Dabikwe ja mikani ngite krübäte nibi ruen ie, abtä tä ja miketa bobre Ngöböbtä, Ngöbökwé niara ngite diandrekä btä abkokäre. Dabikwe ja mikani ngite abko Ngöbö bike denkä btä, akwa kukwe käme nuenbare Dabikwe abtä kukwe taretare rakadrekä btä.

KUKWE NGWIANDRETARI:

1. ¿Ni ne mden abko Dabi?
2. ¿Dabikwe kukwe nuenbare kuin ya, käme ya?
3. ¿Nirekwe ni mda ne juani blite Dabibe?
4. ¿Kukwe blo bätäkän ngwarbe rakadrekä Dabibtä ya?

2 Samuel 12.1-10



Ni dokwä tä namaninkä kriküde tákäte käin ne abko kä Asalon. Asalon ne abko Dabi ngobo kwe. Niara ütiäte kri arato, ñobtä ñan angwane niara rün abko jrei. Asalon tö rabai jreire, aisete ñan tö rün Dabi tuai jreire mda, akwa Ngöbö ñan tö Asalon tuai jreire. Dabi abko tädre jreire, ie Ngöbö tö, akwa mtare Asalon dokwä tä namaninkä kriküde tákäte käin tuen nete. Mula kwe abko tä näin betekä jangunu. Niara nämane näin mula nebti, akwa mtare bike neme namaninkä kri tákäte nete. Jatadreta ño timon ñan rükadre gare ie. Ye btäräbe ni mda mda ja rüere Asalonbe jatadi abko käkwe Asalon kämikadi, aisete Asalon ñan rabadre jreire, ñobtä ñan angwane Ngöbö ñan tö niara tuai jreire aisete.

KUKWE NGWIANDRETARI:

1. ¿Dre nakaninkä Asalonbtä?
2. ¿Niara rabadi jreire ya?
3. ¿Asalon rabadre jreire, ie Ngöbö tö ya?

2 Samuel 18.9-18




Jrei ne abko kä Salomon. Niara abko Jrei Dabi ngobo. Nete Salomon tä kukwe ükete meri nibu ne kräke. Ngäbäkre chi tä ni iti kisete, ne mdenbtä abko dre nuendre meri nekwe abko tä näin ngwentari Salomonye, ñobtä ñan angwane ngäbäkre ne abko jakwe meri nibu ne tä niere. Akwa meri iti kätä ni ngökö. Meri mden tä ni ngökö abko gare ñakare metre Salomonye. Akwa meri mden tä ni ngökö abko Ngöböta niere Salomonye. Abtä Salomonkwe ngäbäkre ñäkädibti ötöbu ta kräke, Salomonta niere ietre. Angwane ngäbäkre meye era metre kätä niere: Ñakare, makwe ñan ngäbäkre ye tikaka ötöbu ta tikän, akwa bien jirekäbe meri seye, niebare kwe. Ye angwane, meri mden ngäbäkre meye metre abko nükani gare Salomonye, aiseti Salomonkwe ngäbäkre bianinta meye kweye. Ngöbökre Salomon mikani töbtä kri kore.

KUKWE NGWIANDRETARI:

1. ¿Ngäbäkre chi tikadrekä ötöbu, ie meye tö namani ya?
2. ¿Nirekwe Salomon mikani töbtä?

1 Reyes 3.16-28




Jrei Salomonkwe ju ne mikani btin abko tuen nete. ¿Salomonkwe ju ne mikani nirekrä gare mae ya? Ju ne abko Ngöbökrä. Ju ne abko kuin amne tuäre, aise te sribi ñan namani neme bare jötrö ietre. Ni kwati käkwe sribibare kri trekabtä mikare jure. Erere arato, ni kwati käkwe jä dikaninte mikadre jure. Ne aise te ni kwati käkwe sribibare kri. Salomonkwe ju mikani kuin, kanti Ngöbö rükadi nüne abko, käi nibi nuäre krübäte Salomonbtä.

KUKWE NGWIANDRETARI:

1. ¿Ju ne abko nire kräke?
2. ¿Kä nibi nuäre Salomonbtä ya?

1 Reyes 6.11-14



Salomon tä nūnaninkä ju gätäkrä Ngöböbe ken. Ju ne abko namanina bare, aisete nita kwati nete abko jatani ju gätäkrä Ngöböbe käi ngwiankäre nuäre jabtä. Nete Salomon tä blite Ngöböbe, tä kise kaenkä käin blitakäre Ngöböbe. Ngöbökwē jāndrān kuin nuenbare Salomonkrä, abtä tä kuin niere Ngöböye. Erere arato, Ngöbökwē juta Ngöbökwē die mikani amne rün mrö Dabi die mikani kwe. Abtä Salomonta kuin niere Ngöböye. Ngöbökwē niaratre ngibiadre amne die mikadre käre abko tä ribere Ngöböye angwane, Ngöbö tä Salomon kukwei nuen. Ngöböta dre nuemna, erere juta Ngöbökwē kākwe mikadre täte, ne angwane Ngöbökwē ngibiadi kuin käre, Ngöböta niere Salomonye.

KUKWE NGWIANDRETARI:

1. ¿Drekäre ni nükani kwati ju gätäkrä Ngöböbe kanti?
2. ¿Salomon tä dre nuene?
3. ¿Ngöböta Salomon kukwei nuen ya?
4. ¿Ngöbökwē dre niebare?


1 Reyes 8.22-29



Mtare kukwe ulire krübäte tä nakenkä nete Jrei Salomonbtä. Jrei kri Salomon tarebare Ngöbökwé, akwa niara abko käme. Salomon tä jändrän ngwarbe mike ngöböre jae. Jändrän ngwarbe sribebare ni bä kwrere tä tākānintebe, ne ben Salomonta blite. Jändrän ne abko dātebare ni mdakwe. Ne abko jändrän ngwarbe kādianta ngöbö ngwarbe. Jändrän ne abko tōi ñakare, akwa Salomonta ja di kärere ie. Salomon kukwe ruen ñakare ngöbö ngwarbe neye, ñobtä ñan angwane jändrän ne abko nire ñakare. Salomon tä dre nuene ne abko tuen Ngöböye kä käinbti, aise te Ngöbö nibi romon Salomonkrä amne Ngöbökwé Salomon mikadi ja ngie nuen kukwe käme nuenbtä kore, Ngöböta niere. iSalomon bobre! ¿Drekäre kukwe nuenbare käme kore kwe? Jändrän ngwarbe mikadre ñakare ngöböre kwe jae näre, akwa mikani ngöböre kwe jae amne Ngöbö era metre abko ñan tarebare kwe.

KUKWE NGWIANDRETARI:

1. ¿Salomonta blite Ngöböbe ya?
 2. ¿Ngöbö tä mdente?
 3. ¿Ngöbökwé Salomon mikadi ja ngie nuen ya?
- 1 Reyes 11.1-10



Ni ne abko kä Elia. Elia tä ja gete Ngöböbe. Niara abko moto kuin, akwa ni mda tö kukwe nuei käme btä. Kä rabadre moren raire angwane, ñü ñan räkandre temen abko, Eliakwe ribebare Ngöböye. Erere Ngöbökwē ñü mikani näkäen ñakare jötrö mda temen abti kä jatani niken raire ta. Abtä jrei nibi romon Eliakrä amne jrei jürä nibi Eliabtä, aise te Elia ngiti mda. Tä täkänintebe känime ñö kräbti nete. Kä ne kanti mrö ñakare Eliakrä amne mrö rürümoin ñakare arato. Akwa Ngöböta mrö juen Eliakrä. Nukwäta nüke mrö ngwena Eliakrä. Ye kwrere Ngöböta ja kukwei muko Elia ngibiare.

KUKWE NGWIANDRETARI:

1. ¿Ngöbökwē dre nuendre abko, Eliakwe ribebare Ngöböye?
2. ¿Ñobtä Elia tä nete?
3. ¿Dre nämane nüke mrö ngwena Eliaye?

1 Reyes 17.1-7




Ngäbäkre chi tuen nete. Niara nämane jadenkä ju bäre. Batibe ja jatani ruen bren ie. Abtä meyekwe mikani jänbti, akwa nökrani ñakare, bti krütani. Abtä Eliakwe mikadreta nire abko meyekwe ribebare ie. Ngöbö aibe diebti ngäbäkre ne rabadreta nire Eliaye, aisete Eliakwe ja di käräbare Ngöböye ngäbäkre ne mikakäreta nire. Erere Eliakwe blitabare Ngöböbe amne dre nakaninkä ngäbäkrebtä tuen nete. Nükaninta nire, abko Elia tä bienta meye, aisete kä nibi nuäre meyebtä kareta ngäbti.

KUKWE NGWIANDRETARI:

1. ¿Dre nakaninkä ngäbäkre chi nebtä?
2. ¿Ngäbäkre ne meye käkwe ja di käräbare nireye?
3. ¿Dre nakaninkä mda ngäbäkre nebtä?

1 Reyes 17.17-24




Elia tuen blite Ngöböbe nete. Ngi ükaninkrö jäbti kwe abko, bti Ngöbökwē ñukwä kä käinbti juandre kākwe kukwadre abko Elia tä ribere Ngöböye. ¿Jä amne ngi tä ükaninkrö nete tuen mae ya? Eliakwe ñukwä käräbare Ngöböye, erere Ngöbökwē ñukwä kä käinbti juani, kätä ngi kukwe jökrä. Nebtä abko Ngöbö rüe nekwetaninkä jökrä ñukwä ne tuare. Ngöbökwē Elia kukwei nuadi abko ñakare nämane gare ietre, aise nekwetaninkä, akwa Elia abko namani jäme, ñobtä ñan angwane Ngöbökwē niara kukwei nuadi nämane gare ie. Nebtä abko Ngöbö itibe abko nibi gare ni jökräye.

KUKWE NGWIANDRETARI:

1. ¿Ñukwä mdente jatani?
2. ¿Ngöbökwē Elia kukwei nuani ya?

1 Reyes 18.20-39



Nete Elia tä niken kä käinbti. Elia kukwe muko Eliseo tä mike ñäräre kukwäne. Niaratre nämane näin gwaire, te batibe kareta ñukwä jutra kwrere kä käinbti jatani, kä nikani Elia ngwena Ngöbö kanti kä käinbti. Dän Eliakwe namani ötati temen abko, Eliseo tä ükekrö. Mtare mentokwäre Eliseokwe ñan blitadre mda Eliabe, akwa Ngöböbe abko rabadi blite. Ngöböta Eliseobe, aisete tädi blite ben amne die mikadi kwe.

KUKWE NGWIANDRETARI:

1. ¿Kareta ñukwä jutrare, te nireta nete?
2. ¿Bike niken mdente?
3. ¿Dän Eliakwe namani ötati temen abko, nireta ükekrö?

2 Reyes 2.1-14



¿Meri tä ngäbäkre nibube nete abko tuen mae ya?
Ni mda tä iti abko, ie niarakwe ñan ngwian biandre
jetbe ja ütiäre, ne angwane ni mda ye käkwe ngäbäkre
nibu ye diandikä kän. Ni mda ye näin ngäbäkre ye
ngwena ja gwiriete abko mikadi sribire krübäte kwe
jakrä. Akwa Eliseo abko käkwe kantra ükkrömna meri
neye, bti aseite nämane kantra chite abko kekamna
kiakia kwe kantra mda mdate. ¡Ye erere meri ye nikani
aseite keke amne aseite kantra chite namani krüte
ñakare! Ne aiseite nikani keke bäri mda kantra jökräte.
Aseite nükani kantra krikri iti iti käin. Aseite ye abko
meri ne käkwe rürümoinde, bti ja ütiä biandi kwe
angwane, ni mda ye käkwe ñan ngäbäkre diandikä kän.
Ngöbökwe aseite mikani nirien, aiseite namani krüte
ñakare.

KUKWE NGWIANDRETARI:

1. ¿Ñobtä meri ne nämane ulire?
2. ¿Dre nuendre kwe, Eliseokwe niebare ie?
3. ¿Ñobtä aseite namani krüte ñakare?

2 Reyes 4.1-7




Meri ne abko brare kwe yäke. Niara bren, aisele bikera niken. Ngäbäkre merire tä tākānintebe nete ne kākwe blitabare Ngöböbtä amne Ngöbö kukwe muko Eliseobtä ben. Eliseo rabadre ni bren ne miketa quinta niebare kwe ie, aisele mtare ni ne bike niken Eliseo känene ja kräkāi mikakäre. Angwane Eliseokwe ja di kärädi Ngöböye angwane, ni bren ne rabadita kuin. Ngäbäkre merire kākwe blitabare Ngöböbtä ni bren nebe, erere arato merire kwebe. Ye abko kuin krübäte, ñobtä ñan angwane niaratre, ie Ngöbö gare ñakare jire, aisele niarakwe niebare ietre angwane, batibe Ngöbö namani gare ietre.

KUKWE NGWIANDRETARI:

1. ¿Ngäbäkre merire ne kākwe dre niebare ni brenye amne meri kweye?
2. ¿Ni bren ne bike niken mdente?

2 Reyes 5.1-14



Ni bren jatani niken nikwe tuaba abko mden tä nūnaninkä nete. Jatani ja kräkäi mikamna Eliseoye, aise te tä blite Eliseobe nete amne, Eliseokwe juni jūben ñō Jordante ja ngōkadre bā kükü ñōte kwe angwane, rabadreta quinta, nini Eliseokwe ie. Akwa ni ne ñan tö nibi Eliseo kukwei mikai täte, ñobtä ñan angwane ñō ye kākwe ñan mikadreta quinta nibi nütüre, akwa bti niki jūben ñōte. Nibi ñobtä angwane, nakwan bati, bobu, bämä, bäbkä, bārike, bā ti, bā kükükäre, nakwanta ñōte, ki nüketa jate angwane, nibirate kuin jōkrä bobuta. Eliseokwe mikaninta quinta abko, ütiäre ki jändrän ngwena biandre Eliseoye. Akwa Eliseota täkänintebe abko ñan tö nibi ngwian kaen ngäbti ie, ñobtä ñan angwane Eliseo ñan tö ngwian niarakwe den jae.

KUKWE NGWIANDRETARI:

1. ¿Nita nūnaninkä nete ne abko kä ñō?
2. ¿Dre nuendre kwe, niebare Eliseokwe ie?
3. ¿Eliseo tö ngwian niarakweye ya?

2 Reyes 5.9-16



Eliseo tä takänintebe ju jakwebti käin. Angele sribikä Ngöbökwe tä ruäre kä käinbti abko tä tuen. Angeletre ne abko jatani Eliseo die mike. Erere arato, jatani ngäbäkre ne die mike, ñobtä ñan angwane ni ruäre moto käme tö namani kukwe nuei blo Eliseobtä. Abtä Ngöbökwe angele sribikätre kwe ne juani Eliseo die mike, aisele angeletre ne kākwe Eliseo ngibiadi kukwe mukobe gwaire amne, ni mda mdakwe ñan kukwe nuendi blo btä.

KUKWE NGWIANDRETARI:

1. ¿Dreta nakenkä nete?
2. ¿Ni raba angele sribikätre tuen käre ya?
3. ¿Angele tarä gwi nete ya?

2 Reyes 6.13-17




Ngäbäkre chi tuen nete. Ne ie kä kwä kükübe, akwa niara nena jreire juta Ngöbökwebti. Ni jökrä käkwe niara kukwe mikadre täte, Ngöbökwe niebare. Ni mda mda tä niara die mike sribibtä amne tä töitike sribibtä arato. Ngäbäkre abko kä Joa. Joa tä Ngöbö tarere krübäte. Niara namani jreire abko, käi nuäre ni jökräbtä. Jrei chi ne rabadi kri angwane, ju gätäkrä Ngöböbe ükadreteta gadi kwe amne niarakwe ükaditeta. Yebti rabadi ünän angwane, kukwe nuendi tare krübäte kwe. Niarakwe ñan Ngöbö taredre mda amne, rabadi blite ngöbö ngwarbebe. iNe abko kukwe ulire krübäte! Akwa ma abko rabadi kri angwane, makwe Ngöbö aibe taredre amne niara aibe, ben makwe blitadre ñnan kore ya? Ngäbäkre tä nete, ne käkwe Ngöbö käikwitadikä jabti angwane, rabadi ulire krübäte.

KUKWE NGWIANDRETARI:

1. ¿Jrei chi ne, ie kä kobe?
2. ¿Niara rabadi ünän angwane, tädi Ngöbö tarere ya?
3. ¿Kä kobe mae?
4. ¿Ma tö Ngöbö tarei ya?

2 Reyes 11.1-12



Jrei ne kä Esekia abko tä ja di kärere Ngöböye. Ni iti jatadi ni rükä ngwena kwati niara kaen ngite abko jänükani täräre ie. Abtä tä ja di kärere Ngöböye. Jrei Esekia nibi ulire krübäte amne ja nuendre kwe ñan nebe nüke gare ie. Abtä niara ki ju gätäkrä Ngöböbete blitakäre Ngöböbe kukwe nebtä, kätä niere Ngöböye: iNgöbö ma raba ti dentari juta tikwebe gwaire! Ma kri krübäte ye mike gare ni jökräye amne, ma Ngöbö nunkwe, ye mike gare ni jökräye, Esekia namani niere Ngöböye. Jrei Esekia nämane blite Ngöböbe, ye abko jarabare Ngöböye amne, jötrö ngwarbe Ngöbökwé Esekia die mikadi abko ni jatadi iti, käkwe niedi Esekia ye. Esekia kwé blitabare Ngöböbe abkobtä Ngöbökwé kukwe nuani, aise te Esekia ngibiadi kwe.

KUKWE NGWIANDRETARI:

1. ¿Ñobtä jrei ne tä ulire?
2. ¿Tä blite nirebe?
3. ¿Jrei Esekia kukwei nuani Ngöbökwé ya?

2 Reyes 19.1-20



Nita tākānintebe nete ne abko jrei mda. Niarata Ngöbö mike ütiäte jae. Niara abko kä Josia. Kä kwä kwäbe ie angwane, namani jreire. Mtare niara nena ünän. Mtare tärä kuni ju gätäkrä Ngöbökwete abko, ni nü iti ngwena tuadre ie. Yebtä abko ñan tõi nebe krütare tuen nete. Tärä nebtä abko Ngöbö kukwei ruäre tä tikani. Josia kākwe ñan Ngöbö kukwei tuabare, aisete Ngöbö tö dreye abko gare ñakare ie. Akwa mtare mentokwäre Ngöbökwete dre niebare, ye erere nuendi kwe, ñobtä ñan angwane mtare Ngöbö kukwei nibira niara kisete amne ñākādi btä kwe.

KUKWE NGWIANDRETARI:

1. ¿Ñobtä jrei ne ñan tõi nibi krütare?
2. ¿Tärä Ngöbökwete ne abko kwani mdente ni neye?
3. ¿Tärä btä Ngöbö kukweita tärä makwe ya?
4. ¿Tärä ye abko kä ño?

2 Crónicas 34.18-28




Nitre iraelita tä nete ne tä ja müaire jökrä, ñobtä ñan angwane kukwe nuenbare käme kwetre Ngöbö rüere, aisete tätre müen. Ni tuen ñäke ietre ne abko kädianta Esdra. Niara abko ja kukwe mukore Ngöböbe aisete, dre nuendre kwetre, ie Ngöbö tö abko gare kuin niaraye. Nitre ne käkwe dre nuenbare, ¿ye gare mae ya? Meri ñakare tödekaka Ngöböbti, ben ja mikani gure kwetre angwane, niaratrekwe kri oto amne jä oto mikadre ngöböre jae aune, blitadre kwetre ben, ie merire tö namani amne, Ngöbö era metre abko, ñan mikadre ütiäte kwetre, ie merire kwetre tö namani. Kukwe ye abko käme krübäte, aisete meri Ngöbö tarere ñakare, ben ñan ja mikadre gure Esdrata niere ietre. Meri käta Ngöbö tarere ñakare abko, ben niaratre ñan ja mikadre gure, ie Ngöbö tö, akwa nuenbare kwetre. Abtä tätre ulire jökrä mtare. Ye kwrere, ni Jesukrito tarere ñakare, ben nikwe ñan ja mikadre gure jire chi.

KUKWE NGWIANDRETARI:

1. ¿Nitre ne käkwe dre nuenbare?
2. ¿Tärä mdenbtä Esdrata ñäke gare mae ya?

Esdras 10.1-12



Nita nete, btä kamisa ñakare ne abko kä Job. Kena jändrän nämane kabre krübäte kwe. Obeja nämane kwe, nbi nämane kwe, akwa mtare ngwian btä jändrän mda mda nianinkäta jökrä kän. Erere arato, mtare Job bren dikaro amne tä ulire krübäte arato. Diablukwe kameo, nbi amne niara ngäbriänkä kämikani jökrä kän, aise te jändrän namani ñakare mda kwe. Mden aise te Job namani bobre. Job tä ulire akwa, niara tä ñäke ñakare blo Ngöbö rüere. Niarata niere: Ngöbö, ma moto kuin. Tita ma tarere, aise te dre rakadrekä tibtä, akwa ti tädi jäme, niarata niere.

KUKWE NGWIANDRETARI:

1. ¿Ni ne kä ño?
2. ¿Dre nakaninkä jändrän kwekwe btä?
3. ¿Job tä Ngöbö tarere ya?

Job 1.1-22




Nita tākānintebe ne abko nire garera mae ya? Jän, niara garera mae. Niara abko Job. Niara ne mden namani bobre amne namani bren dikaro arato, akwa mtare nenante kuinta. Ngöbökwe jändrän bianinta bäri kabre mda ie. Mtare nbi, obeja amne ngwian bäri kabre kwe. Ngöbö abko, bäri moto kuin garera ie, aisete Job tä Ngöbö tarere krübäte amne, niara tare kri Ngöbökwe arato. Job nämane Ngöbö tarere, ¿ye kwrere mata Ngöbö tarere ya? Ngöbökwe ñan jändrän biandre jire chi mae, akwa niarakwe dre nuemna, ¿erere makwe niara kukwei mikadi täte ya? Ma tare kri Ngöbökwe, aisete makwe niara taredre bäri köbö kwatirekwatire, ie ti tö.

KUKWE NGWIANDRETARI:

1. ¿Ni ne kä ño?
2. ¿Ngöbökwe jändrän bianinta kabre ie ya?

Job 42.10-17




Ni ne abko kä Isaia. Ni mda mdakwe dre nuendre abko, Ngöbökwé juani niere ietre. Niara kädianta ni Ngöbö kukwei niekä. ¿Ma raba “Ni Ngöbö kukwei niekä” niere ya? Ni kukwe käme nuenkä kákwe ñan kukwe nuendre kämekäme mda abko, Ngöbökwé niemna ietre. Kukwe käme ñan mikadre temen kwetre, ne angwane Ngöbökwé juta mikadi ja tare nike, niebare Isaiakwe. Juta juandi ngwarbe jökrä Ngöbökwé amne, ju rukwadi jökrä arato, niebare kwe. Juta Ngöbökwé tä ja mike ngite, käta kukwe nuene kämekäme, yebtä Ngöböta neme ulire, aisete ni nünanka juta nete kákwe ñan kukwe nuendre kämekäme mda, abkokäre Ngöbökwé Isaia juani blite bentre. Abti Isaia kákwe Ngöbö kukwei tikani täräre arato.

KUKWE NGWIANDRETARI:

1. ¿Ni ne kä ño?
2. ¿Dre niebare kwe ni mda mdaye?

Isaiás 1



Ngäbäkre chi tä nete tuen. Jändrän ngwarbe tä kabre nete, ¿tuen mae ya? Niarata kise mikani nbi rorokräbti ta amne kwra lion kri tä nünaninkä kwekbe niara ken, akwa lion tä jäme niarakra. Obeja tä nete, kanti lobo drüne tä arato, ¿tuen mae ya? Obeja ne ñan kwetadre lobokwe amne, ñan mikadre bren kwe arato. Köbödira jire Ngöbökre jändrän jökrä mikadi ja gete jäme jökrä, aise te kä rabadi nuäre btätre. Angwane minchi rabadi ja gete jäme nukrobe amne ñan rüdre mda kwetre. Erere arato, ngäbäkreke ñan rüdre mda jabe kwärikwäri amne, kukwe ñan nuendre kämekäme jabtä kwetre. Ne angwane Ngöbökre kä mikadi nuäre amne kä rabadi jäme jökrä.

KUKWE NGWIANDRETARI:

1. ¿Lionkwe ngäbäkre ne mikadi bren ya?
2. ¿Batira jire Ngöbökre dre nuendi minchibtä amne nukrobtä?

Isaías 11.1-10




Ni ne abko Jeremia. ¿Ma kukwei raba nikwitete “Jeremia” niere ya? Niara Ngöbö kukwei niekä amne, tä ja kukwe mukore Ngöböbe. Nitre juta nete käkwe nünandre metre abko, Ngöbökwé juani niere ietre, akwa nitre nünanka juta nete ñan tö Jeremia kukwei nuen blite kore. Niaratre tö nünai käme, aisete Jeremia kise märite kwetre ie, bti kitadi kä teri kwetre, bti jukwe dikadi bti kwetre, ñan gitiadreta abkokäre. Ne aisete Jeremia tädi ngite köbö kwatirekwatire nete. Ni jökrä nibi kite Jeremia bäre, kä nibi mike yakrä jae amne nibi kötaire. ¡Jeremia bobre! Akwa Ngöbö tä niarabe, aisete Ngöbökwé nitre ne mikadi ngite Jeremia dokwäre.

KUKWE NGWIANDRETARI:

1. ¿Dre nuenbare nitre nekwe Jeremiabtä?
2. ¿Jeremia abko ja kukwe mukore Ngöböbe ya?
3. ¿Ngöbökwé Jeremia die mikadi ya?

Jeremías 20.1-2




Nete Jeremiata bobuta. ¿Makwe tuaba, ye tä töre mae ya? Mtare tä nete blite ni mdabe. Jeremiata dre niere, erere ni mda neta tike jökrä täräbtä. Ngöböta blite Jeremiabe. Niarakwe dre niedre abko, ni ne käkwe tikadre abko, Ngöböta niere ie, aisete Ngöböta dre niere, erere ni ne tä tike täräbtä. Ne abko Ngöbö Kukwei tikata ruäre kwe. Ngöböta dre niere abko tä tikani Tärä Ngöbökwetä, ye abko rabadre gare nie, ie niara tö. Ni ne käkwe tärä tikadi ünän jökrä angwane, ñäkädi btä kwe, kukwe mikakäre gare ni jökräye. Dre nuendre kwetre, ie Ngöbö tö abko rabadre gare ietre abkokäre.

KUKWE NGWIANDRETARI:

1. ¿Jeremia tä dre nuene?
2. ¿Nireta ja kukwei niemna Jeremiaye?
3. ¿Nita tākänintebe ne abko tä dre nuene?

Jeremías 36.1-4




Jeremia nämane Ngöbö kukwei nuen abko nämane niere amne ni iti nämä tike, ¿ye tä töre mae ya? Tärä tikamna ünän jökrä angwane, Ngöbö nämane dre niere tikani tärbtä abko, ngwiamna kwe biandre jreiye. Jreikwe näkábare ruäre btä angwane, jreikwe jändrän kuin nuendre amne, kukwe kämekäme abko mikadre temen kwe, Ngöbö nämane niere ie. Abtä jrei moto namani romon krübäte mda, ñan tö namani Ngöbö kukwei mikai täte. ¡Aingwaree! ¿Se ñan jreita kukwe nuene käme krübäte ya? Niara tä Tärä Ngöbökwite kite ñukwäte. Niara ñan tö Tärä Ngöbökweye. Nebtä Ngöbökwite jrei mikadi ja ngie nuen krübäte, ñobtä ñan angwane niara ñan tö Ngöbö kukwei nuai amne, nin tö mikai täte arato. Abtä Ngöbökwite ngwiandi ja tare nike.

KUKWE NGWIANDRETARI:

1. ¿Ni ne abko kä ño?
2. ¿Tä dre nuene?
3. ¿Nebtä dre rakadikä jreibtä?

Jeremías 36.19-24




Nete kukwe ulire krübäte tä nakenkä. Nete juta Ngöbökwe jänäin mobe juta mdate. Niaratre jänäin mente, ju kwekwe rabadi jökrä ietre. Tö rabai näinta ja gwiriete, akwa ñan raba nüketa jire. Ni niaratre ngwianka abko niaratre rüe, aiseite metadi kwe ji ngrabare amne, ruäre abko kämikadi kwetre. ¡Ni jökrä tä ulire krübäte! ¿Ñobtä kukwe nakaninkä kore btätre gare mae ya? Kukwe nakaninkä kore btätre, ñobtä ñan angwane niaratre abko juta Ngöbökwe, akwa moto kämekäme, aiseite Ngöbökwe mikani ja tare nike. Niaratre käkwe kri oto, jä oto amne ñänä mikani ngöböre jae amne, Ngöbö era metre abko mikani ngwarbe kwetre. Ye mdenbtä abko, Ngöbökwe metadre näre akwa, juta kánti niaratre ñan tö näin, ye kánti Ngöbökwe juani ja ngie nuen. Kwrere nete nikira jökrä jibti tuen.

KUKWE NGWIANDRETARI:

1. ¿Nitire ne bike niken ja gwiriete ya?
2. ¿Ñobtä kukweta nakenkä kore btätre?

Jeremías 39.1-10




Ni ne abko kä Jona. Niarata ngitie mobe Ngöböbtä mento. Ni jökrä käkwe kukwe kämekäme mikadre temen abko niara rikadre niere ietre, abkokäre Ngöbökwé juani blite juta krite, akwa kä nibi tare Jona okwäte niken. Ngöbökwé juani kukwe niere, ye niedre kwe angwane, nane mikadre ja tare nike abko, jürä namani btä, aisete niara tö nibi niken ru nete, rikakäre mobe kä mdabti. Niara ñan kwandretari Ngöböye, tä nütüre, akwa ni ñan raba ngitie jire mobe Ngöböbtä ne rabadre gare Jonaye näre. ¿Ne abko gare mae ya?

KUKWE NGWIANDRETARI:

1. ¿Jona tö näin mdente?
2. ¿Tä Ngöbö kukwei mike täte ya?
3. ¿Dre nuendre Jonakwe, ie Ngöbö tö?

Jonás 1.1-3




¿Nire tä jübenkä mrente nete? Ne abko Jona. Niara nämane rute angwane, batibe mren jatani romon. Abtä ni jökrä käkwe blitabare Ngöböbe, Ngöbökwé ngibiadre abkokäre. Ru ñan rikadre mrente nguse abko ribebare kwetre Ngöböye. Angwane mren rabadreta kwekbe, abkokäre Jonakwe ja kitamna ñöte ni mda mdaye. Niara nämane ngitie mobe Ngöböbtä, aisele Ngöbökwé mren mikani romon, niara tö diänkäre, niebare kwe. Nebtä ni jökrä namani ulire, akwa Jona kukwei mikani täte kwetre, käkwe Jona kitani kluun mrente angwane, ñö namaninta kwekbe batibe. Jona abko tä ñöte, akwa niara ñan krütadre, abkokäre Ngöbökwé ngibiadi, käkwe gwa kri juandi, käkwe ñadikä nire. ¿Gwa kri tä nete tuen mae ya? Nebti köbö mäkäre angwane, gwa kri ne jatadi Jona yaireta ümanbti jate mren kräbti. Nebti Ngöbökwé dre niebare Jonaye, erere mikadi täte jökrä kwe.

KUKWE NGWIANDRETARI:

1. ¿Ñöbtä Jonata mrente?
2. ¿Gwa ne käkwe dre nuendi?
3. ¿Jonakwe nünandi köböbe gwa teri?

Jonás 1.3-17




Ni ne abko Jona arabe tä nete. Niara ngitiani mobe Ngöböbtä angwane, gwa kri käkwe ñaninkä. Bti gwa nükani yaireta jate, kä nõtapti angwane, Ngöbökwe blitabareta bobuta ben, käkwe juaninta mda juta kä Ninibete Ngöbö kukwe niekäre ietre yete. Ngöbökwe niebare ie: Makwe nie krörö nitre nünanka Ninibeye: Munta kukwe nuene kämekäme ti rüere, abtä tikwe mikadi ja tare nike sö mdabtä, makwe nie ietre, niebare Ngöbökwe Jonaye. Erere Jona tuen nete Ngöbö kukwei niere. Ni jökrä tä niara kukwe nuen angwane, ni jökrä nibi ulire amne kä nibi tare krübäte okwäte. Mtare mentokwäre ñan kukwe nuendre kämekäme mda kwetre Ngöbö rüere, ñobtä ñan angwane kukwe käme ñan rabadre ietre, angwane Ngöbökwe mikadre ja ngie nuen nibira gare ietre aisete, Ngöbökwe ñan niaratre mikadi ja ngie nuen, ñobtä ñan angwane tä Jona kukwei mike täte aisete. Jona ngitiani ñakare mda Ngöböbtä, ¿ye käi raba nuäre mabtä ya?

KUKWE NGWIANDRETARI:

1. ¿Jonata dre niere nitre neye?
2. ¿Niaratre tä dre nuene?
3. ¿Ngöbökwe mikadi ja ngie nuen ya?

Jonás 3.1-10



Mtare ti bike kukwe mda niere mae. Kukwe ne abko kukwe nuäre krübäte ngäbäkre kädianta Danielibtä. Jreikwe mrö kuin juani Danielikrä akwa, Danieli abko ñan tö nibi mrö kwetai. Tä mrö ngwiamnanta ja jiebti meri nibu tuen nete neye. ¿Ñobtä ñan tö nibi mrö kwetai, ma tö nibi gain ya? Danieli abko ñan tö mrö ne kwetai, ñobtä ñan angwane jrei tä ja di kärere mröbtä kri otoy amne jä otoy. Erere arato, jändrän ngwarbe mikata ngöböre jae kwe angwane, Ngöbö kri era metre abko, ie ñan tä ja di kärere mröbtä amne, jändrän ngwarbe kämekäme, ie jrei nämäne ja di kärere mröbtä, aise Danieli ñan tö mrö ye kwetai. Mrö kuin bänänte krübäte akwa, Danieli ñan tö kwetai. Danieli tö jändrän mda kwetai, akwa Ngöbökre biandre ie, ye abko bäri kuin kräke, aise ñan tö mrö bänänte jreikwe kwetai.

KUKWE NGWIANDRETARI:

1. ¿Ngäbäkre ne kä ño?
2. ¿Tä dre nuene nete?

Daniel 1.3-17




Nete jrei amne kukwe muko kwekwe tä mrö kuin bänänte kwete. Akwa jändrän mdara jire tä nakenkä, ¿tuen mae ya? Danielita kise kite mdente, ¿tuen mae ya? Ni kise aibe tuen tärä okwä bä jene tike jubtä nete tuen. Nete ni ñakare, akwa ni kise aibe tä tärä tike. ¿Nire kiseta nete ruen? Nane angele sribikä Ngöbökwe kiseta nete. Ñakare, ne angwane Ngöbö ara kiseta nete tärä tike. Tärä ne abko käta dre niere abko gare ñakare jreiye, aisete Danielita ñäke btä jreikrä. Ngöbö romon jreikrä, aisete ñan rabadre jreire mda, Danielita niere ie.

KUKWE NGWIANDRETARI:

1. ¿Nire kisekwe tärä tikani jubtä?
2. ¿Tärä okwä ne käta dre niere abko, nireta niere jreiye?

Daniel 5.1-17




Danielita blite Ngöböbe ne abko kuin, ñobtã ñan angwane niara tä dre ribere Ngöböye, erere Ngöbökwenuendi. Akwa nita ja rükaninte jukwebtã Danieli trökri, ¿tuen mae ya? ¿Tãtre dre nuene gare mae ya? Tãtre Danieli kukwei nuen. Danieli tä blite Ngöböbe ya abko, niaratre tö gain, kãta kukwe nuen. Danielikwe ñan blitadre Ngöböbe tãtre niere ie, akwa Danielikwe blitadi Ngöböbe angwane, kukwe nuendi kãme kwetre Danielibtã. Niaratre tä nete gare Danieliye, akwa kã jürã nibi ñakare Danielibtã, aise te Danieli tä blite Ngöböbe. Nitre ne kãkwe Danieli mikadi ja tare nike blitabtã Ngöböbe akwa, Danielikwe blitadi jangunü Ngöböbe.

KUKWE NGWIANDRETARI:

1. ¿Danielita dre nuene?
2. ¿Nita jukwebtã ne tä dre nuene?

Daniel 6.1-9



Ni mda mdakwe Danieli kitani lion kabre ne ngätäite. ¿Ñobtä nuenbare kore kwetre Danielibtä gare mae ya? Danieli nämane blite Ngöböbe, abko dokwäre kitani kwetre lion ngätäite. Ñan tö namani Danieli tuai blite Ngöböbe, käkwe kitani kwetadre lionye. ¿Lion tä Danieli kwete ya? Ñakare. Niaratre ñan raba Danieli kwete, ñobtä ñan angwane Ngöbökwé angele kwe juani Danieli ngibiare. Angele ne käkwe lion kada ketaninte, aisete lion ne ñan raba Danieli kwete. Danielita blite Ngöböbe amne, Ngöbö tä niara ngibiarebti.

KUKWE NGWIANDRETARI:

1. ¿Ñobtä Danielita lion ngätäite nete?
2. ¿Lionkwe Danieli kwetadi ya?

Daniel 6.10-23

